

Allegau a sa delìbera Conf. Metr. n.003 de su 16,10,2017

All. A)



TZITADI METROPOLITANA DE CASTEDDU

STATUTU

Premissa

S'istituzioni de sa Tzitadi metropolitana de Casteddu est fata pustis de un percursu incumetzau in su 2005, cun sa costituzioni voluntària de su forum permanenti de is Sìndigus de s'Àrea Vasta, po costruirì e persighiri totus impari una visioni cumpartzida po su sviluppu sotziali, econòmicu e culturali de su territòriu.

Sa Tzitadi metropolitana de Casteddu donat una visioni noa de su sistema urbanu e s'arrelata de un territòriu cun s'àteru, ponendi-sì de impènniu po afortiai is acàpius de solidariedadi de is comunidadis, po costruirì una sotziedadi democràtica prus giusta e unida.

Fundat sa pròpia unicità e capatzidadi de cumpetèntzia aciungendi a pari sa variedadi de baloris de custus logus (culturali e ambientalis) cumentì *un'identità metropolitana comuni*.

Tenit una mirada de sviluppu sustenìbili, pentzendi a is ecellèntzias de su territòriu e a sa valorizazioni de is pròpias cumpetèntzias sotzialis. Cuncurrit a creai oportunidadis noas po cresci e èssiri un alletamentu po totu s'isula, s'Europa e s'àrea Mediterrànea.

S'impènniat a persighiri su benèssiri, sa saludi, sa seuresa e serenidadi de chi ddoi bivit, ddoi

traballat e stùdiat in su territòriu metropolitanu, cun d-unu sistema integrau e atzessibili cun servìtzios, infrastruturas e arretzas, garantendi semplicitzadi ne is protzedimentus amministrativus, cun arrègulas oguallis po totus, arreconoscendi su tempus cumentu su balori de innui realizai políticas de conciliaduras adeguadas.

Acratau cun delìbera de sa Cunferèntzia Metropolitana n.001 de su 23/05/2016

Modificau cun delìbera de sa Cunferèntzia Metropolitana n.002 de su 29/03/2017, art.2, art.8

Modificau cun delìbera de sa Cunferèntzia Metropolitana n.003 de su 16/10/2017 art.22

TÌTULU I

PRINTZÌPIUS GENERALIS

Art.1

Sa Tzitadi metropolitana de Casteddu

1. Sa Tzitadi metropolitana de Casteddu est un enti territoriali d'àrea manna constitutivu de sa Repùblica cunforma a s'articulu 114 de sa Costitutzioni.
2. In sa Tzitadi metropolitana de Casteddu funt rapresentadas is comunidadi localis costituias de sa populatzioni de is comunus cunforma a s'articulu 2 sighbenti, chi tenit cumenti comunu capoluogo de sa Regioni raportus istrintus de integratzioni territoriali, econòmica, tzivili e sotziali.
3. Sa tzitadi metropolitana de Casteddu cunformat sa pròpia atzioni de governu a is printzìpius de imparzialidadi, giustesa, eficèntzia e eficàcia e assegurat una rapresentàntzia ugualli po is fèminas e is òminis ne is membrus pròpius e struturas aministrativas, e ne is membrus collegialis de is entis, de is aziendas e de is istitutzionis chi dipendint de issa etotu.
4. Sa Tzitadi metropolitana de Casteddu est titulari de funtzionis pròpias, de cussas conferias de sa lei de su Stadu e de sa Regioni Sardigna e de cussas atribuidas de is comunus chi ndi faint parti, arrespetendi is cumpetèntzias, e ddas esertzitat circhendi de evitai de si pònniri asuba a àterus entis e de acordai is arrègulas.
5. Candu funt cumprovasdas econòmias po sa cussertatzioni e gestioni de is servìtzius, sa Tzitadi metropolitana de Casteddu podit delegai cun conventzionis spetzìficas is funtzionis chi ddi pertocant inderetura a is comunus a solus o assotziaus o a is unionis de is comunus de su territòriu cosa sua.
6. Sa Tzitadi metropolitana de Casteddu coordinat is atvidadis e is atzionis de svilupu chi fait impari a is comunus chi ndi faint parti, de su Stadu e de sa Regioni, cunforma a is printzìpius de agiudu, diferentziatzioni e collaboratzioni sintzera po totus.
7. Sa Tzitadi metropolitana de Casteddu cunsiderat sa produtzioni, is arresursas stòricu-culturalis, naturalis, ambientalis e de su paesàgiu, is traditzionis, is cumpetèntzias e is sabidorias de donniunu cumenti un patrimòniu de totus, po podi definiri is polìticas de fai cumenti àrea vasta, mancai in d-una visioni totali e innui su cuntestu metropolitanu si ponit a cunfrontu a manera internatzionali.
8. Sa Tzitadi metropolitana de Casteddu interpretat is abisòngius e desidèrius de is tzitadinus e tzitadinas, favoressendi sa connoscèntzia, sa circa scientifica e s'innovatzioni,

po otènniri una calidadi de ambienti urbanu e rurali, salvaguardai sa biodiversidadi, s'integratzioni de is servìtzios, de is infrastruturas e de is arretzas de comunicatzioni, sa cura e po torrai a bivi is logus e is benis de totus, in d-un'òtica de sustenibidadi (ambientali, econòmica, e sotziali) e de ecuilìbriu territoriali.

9. Sa Tzitadi metropolitana de Casteddu fovoressit sa partecipatzioni tzìvica e s'abilidadi de totus po melliorai sa calidadi de sa vida (benèssiri) de is personas e de is comunidadi, cumenti proponimentu po su sviluppu de totu su territòriu regionali.

10. Sa Tzitadi metropolitana de Casteddu amparat sa cultura de sa legalidadi e de sa formatzioni tzìvica.

11. Sa Tzitadi metropolitana de Casteddu favoressit su fatu chi is tzitadinus e is tzitadinas pighint parti a solus o a manera assotziada; traballat cunfrontendi-sì cun is entis localis, is assotziatzionis, sa realtadi sotziali e econòmica, su mundu de sa cultura e de sa circa scientifica, is organizzatzionis de rapresentàntzia de is categorias produtiva e sindacalis, po integrai e cualificai is pròpias politicas de interventu.

12. Sa consultatzioni e su pigai parti funt dissiplinadas de regolamentu spetzìficu. S'ant a circai soluzionis collaborativas particularis, cunforma a su regulamentu apòsitu, in s'àmbitu de sa pianificatzioni stratègica e territoriali e de sa programatzioni europea.

13. Sa Tzitadi metropolitana de Casteddu favoressit su volontariu e su de tres setori, cumenti arresursa po sa comunidadi, espressioni de partecipatzioni democràtica e unidadi sotziali.

14. Sa Tzitadi metropolitana de Casteddu assegurat su prus pòssibili trasparèntzia e pubritzidadi de s'atividadi amministrativa cosa sua e s'informatizzioni de is protzeduras. S'impènniat a valorizai e difùndiri is datus liberus (open data) cumenti fattori stratègicu po su sviluppu econòmicu e sotziali. Garantiscit diritu oguali po acedi a s'arretza po totus e promovit atividadis de tzitadinàntzia digitali.

15. Sa Tzitadi metropolitana de Casteddu assegurat s'arrespetu, de is diritus e doveris de chi ddoi bivit, traballat e studiat in su territòriu metropolitanu, fora de distìngui su gèneri, religioni, etnia, lingua, opinionis politicas, cunditzionis personalis e sotzialis, cun atzionis de cuntrastu a sa poboresa, a sa disugualliantzia e a totu is formas de esclusioni.

16. Sa Tzitadi metropolitana de Casteddu promovit s'aculliantzia, s'integratzioni de is personas e su confrontu de is culturas chi s'arreconnoscint ne is baloris de sa Costitutzioni e pigant parti a su sviluppu econòmicu sotziali de sa comunidadi metropolitana.

17. Sa Tzitadi metropolitana cumpartzit, favoressit e assegurat s'integratzioni econòmica e culturali e is políticas de coesioni de s'Unioni Europea. Po custu impreat is struturas netzessàrias po promovi e coordinai programmas e iniziativas tessendi raportus istituzionalis de collaboratzioni, cunfrontu e amparu cun àteras tzitadis e àreas metropolitanas europeas e in su Mediterràneu.

18. Sa Tzitadi metropolitana tenit cumenti sinnus po di distingui, unu stema e un gonfaloni. Po ddu imperai e ddu torrai a riprodusi ddoi funt arrègulas pretzisas.

Art.2

Territòriu, sedi e emblema

1. Su territòriu de sa Tzitadi metropolitana de Casteddu cointzidit cun is Comunas chi, cunforma a sa Lei de sa Regioni Sardigna n.2 de su 4 de Freàrgiu 2016, ndi faiant parti: Assèmini, Casteddu, Cabuderra, Su Masu, Pauli, Quartu Sant'Aleni, Quartùciu, Ceràxius, Sestu, Deximumannu, Maracalagonis, Pula, Sarrocu, Sètimu, Sìnnia, Santu Perdu, Uda.

2. Sa Tzitadi metropolitana de Casteddu, de innoi in bàsciu "Tzitadi metropolitana", tenit sa sedi istituzionali in Casteddu.

3. Sa Tzitadi metropolitana de Casteddu ndi pigat custu stema, descritu aici:

scudu pratziu: una primu parti in campu biancu cun cruxi arrùbia cun cuàturu morus cun sa fàscia ne is ogus e giraus a parti de manca de chi castiat; in su segunda parti, pratzida in cuàturu, in sa prima e in sa de cuàturu ddoi est una cruxi bianca in campu arrùbiu, in sa segunda e in sa de tres un casteddu cun tres turris in campu biancu chi ndi bessit de su mari.

4. Pigat fintzas custu gonfaloni aici descritu: brocau colorau de arrùbiu e de asulu cun ricamus erraticus a colori de oru e cun su stema descritu in su comma pretzedenti, cun s'iscritzioni in su tzentru a colori de oru "CITTÀ METROPOLITANA DI CAGLIARI". Sa parti in metallu e is cordonis de oru. De s'asta movint duas fàscias cun sa fràngia de oru, unu cun is tres coloris de sa bandiera italiana, s'àteru cun is coloris de sa bandiera sarda.

TÌTULU II

RUOLUS E INCÀRRIGUS DE SA TZITADI METROPOLITANA

Art.3

Pianificatzioni strategica

1. Su Pianu Stratègicu de su territòriu e de sa comunidadi metropolitana est un atu de fundamentu de s'Enti.
2. Su Cunsillu metropolitanu, cun proposta de su/sa Sindigu/a, achiriu su parri obligatòriu de sa Cunferentzia metropolitana, aprovat su Pianu Stratègicu Metropolitanu cumentu incàrrigu e atzioni po sa Tzitadi Metropolitana e po s' eserzitiu de is funtzionis de is Comunas chi ndi faint parti.
3. Sa Tzitadi metropolitana, cun s'aprovatzioni e atuatzioni de su Pianu Stratègicu metropolitanu, s'impenniat a realizai is cunditionis mellioris po su sviluppu econòmicu, ambientali e sotziali de su territòriu cosa sua e de sa Regioni, in d-una visioni de ogualliantzia, economitzidadi, eficàtzia, eficièntzia e ètica e cun particolari riferimentu a sa calidadi de is servìtzius.
4. In su pianu stratègicu si definiscint is incarreladas de programatzioni, is obietivus generalis, de is setoris e de cussus po su sviluppu de mèdiu e longu tempus po s'àrea metropolitana, agatendi is prioridadis de interventu, is arresursas netzessàrias po ddu persighiri, is tempus e sa modalidadi po ddus atvai, is modus e trastus po ddus cumpudai.
5. Su Pianu stratègicu costituiscit un quadru generali de riferimentu po totu is pianificatzionis e programatzionis de sa Tzitadi metropolitana.
6. In relatzioni a is cambiamentus e a is arresurtaus cunsighias, su/sa sindigu/a metropolitan/a, achiriu su parri obrigatòriu de sa Cunferentzia metropolitana, sutaponit dònna annu a su Cunsillu metropolitanu is propostas de revisioni cunforma a su Pianu stratègicu.

Art.4

Pianificatzioni Territoriali e governu de su territòriu

1. Sa tzitadi metropolitana esèrtzitat is funtzionis de pianificatzioni e governu de su territòriu metropolitanu cun su Pianu Territoriali de Coordinamentu Metropolitanu, cunforma a si chi est stabiliu de sa normativa vigenti.
2. Su Pianu Territoriali de Coordinamentu Metropolitanu fatu in coerèntzia cun is indiritzus e obietivus de su Pianu Stratègicu Metropolitanu, arrespetendi is printzìpius de agiudu,

adeguamentu e diferentziamentu:

- Est un puntu de riferimentu po sa connoscèntzia e interpretatzioni de su territòriu, a incumentzai de sa pianificatzioni urbanistica vigenti;
- Definiscit is sciobers po su governu de su territòriu in su mèdiu e tempus meda;
- Donat un'impunna e coordinat is protzessus po allogai, torrai a cualificai e valorizai is sistemas insediativus, industrialis, agrìcolus e produtivus, ambientalis, paesagisticus e de is servìtzios, fintzas cun s'identificatzioni de is logus po ndi fai una collaboratzioni de prus comunus impari;
- Gestiscit in forma assotziada is políticas de su territòriu e ddas coordinat a livellu sovracomunali, fintzas agatendi is logus prus adatus po sa gestioni de is servìtzios;
- Stabiliscit, in prus, is indiritzus e obietivus po s'atividadis de pianificatzioni e s'esertzìtziu de is incàrrigus de is Comunus chi faint parti de su territòriu metropolitanu.

3. Su Pianu Territoriali de Coordinamentu Metropolitanu constituiscit un riferimentu po sa pianificatzioni urbanistica e de setori de cumpetèntzia de is comunus, cunforma a sa normativa vigenti.

4. Sa Tzitadi metropolitana circat de integrai su prus possìbili sa politica e is disponimentus de is comunus po su governu de su territòriu, circhendi de armudiai is regolamentus e is protzeduras po totu s'àrea metropolitana, mancai cun su coordinamentu e sa cooperatzioni de is ufìtzios cumpetentis.

5. Ne is àmbitus spetzìficus de cumpetèntzia, cunforma a sa normativa vigenti, su Pianu Territoriali de Coordinamentu Metropolitanu torrat a pòniri is contenudus e incàrrigus de sa pianificatzioni de setori.

6. Su Pianu est aprovau de su Cunsillu metropolitanu, impari a is documentus de valutatzioni, achiriu su parri obligatòriu de sa Cunferèntzia metropolitana.

Art.5

Trasparèntzia e partetzipatzioni

1. Is protzedimentus de elaboratzioni e revisioni de su Pianu stràtègicu metropolitanu e de su Pianu Territoriali de Coordinamentu Metropolitanu, funt ispiraus a su printzìpiu de trasparèntzia e a sa manera de partetzipai ponendi in contu de pianificai impari a is Comunus e is àterus Entis interessaus e is modus po fai pigai parti a is atividadis econòmicas e sotzialis.

2. Un regulamentu stabiliscit is modalidadis po ndi fai fai parti a chi est interessau.

Art.6

Funtzionis e políticas de interventu

1. Sa Tzitadi metropolitana de Casteddu pessighit de acumpriri is cunditionis struturalis e tareas po favoressi unu sviluppu sotziali, econòmicu e culturali, po su benèssiri de totu sa comunidadi e de is generatzionis de su benidori cun:

- promotzioni de sa gestioni integrada de is sistemas naturalisticu ambientali;
- verìfica, càmbiu e preventzioni de is situatzionis de arriscu idrogeològicu e de s'impreu de sa terra;
- creai oportunitadis noas de traballu, valorizandi e ponendi a sistema is arresursas ambientalis, culturalis e umanas e sa formatzioni professionali po is setoris econòmicus de sa Tzitadi metropolitana;
- afortiai s'economia, aciungendi apari traditzioni e annoadura;
- integri is sistemas produtivus e sa creazioni de economias acapiadas apari, pighendi sa calidadi cumentu elementu caraterizanti;
- pianificatzioni de su sistema produttivu e cumertziali, po cualificai s'atzessibilitadi e favoressi una distribuzioni de is servìtzius metropolitanus ogualis po totus;
- creai infrastruturas adeguadas e predisponni is logus po sa produzioni de benis e servìtzius e impresas "start up";
- organizatzioni de un sistema urbanu metropolitanu cunfromau a is sistemas printzipalis paesagìsticus ambientalis;
- favoressi una polìtica po torrai a costrui in su cuntestu urbanu e cuntrastai s'abusivismu edilitziu e de impreu impròpiu de is arresursas ambientalis, fintzas cun d-unu controllu e amparu de su paesàgiu;
- arresparmiari e un mellus impreu de s'energia, po ridusi s'incuinentu e s'impatu ambientali, arrespetendi is inditus comunitàrius;
- organizatzioni de un sistema efficienti e integrau de su trasportu pùblicu po totu sa Tzitadi metropolitana e favoressi sa spainadura de sa mobilitadi sustenibili;
- favoressi sa connoscentzia de is fenòmenus territorialis de importu po sa Tzitadi metropolitana, fintzas cun d-unu osservatòriu dedicau e definiri is acòrdius po si coordinai cun istitutis, entis, tzitadinus o assòtzius e àteras tzitadis metropolitanas;
- organizatzioni e gestioni de is servìtzius integrais (po s'àcua, is arrefudus e s'energia)

arrespetendi is printzìpius de eficèntzia, economicidadi e sustenibilidadi ambientali e sòtziu-culturali;

- organizai e gestiri is servìtzius a sa persona de rangù metropolitanu;
- cuntrastai s'abandonu de is scolas e favoressi su diritu a su stùdiu, mancai con d-una cualificatzioni de su sistema educativu e de sa circa scientìfica.

2. Po custu orientat is polìticas territorialis e circat de favoressi acòrdius cun is Comunas e is Unionis e is àterus Entis.

TÌTULU III

ÒRGANUS DE SA TZITADI METROPOLITANA

Art.7

Òrganus de sa Tzitadi metropolitana

1. Faint parti de sa Tzitadi metropolitana de Casteddu:

- Su/sa Sìndigu/a metropolitanu/a;
- Su Cunsillu metropolitanu;
- Sa Cunferèntzia metropolitana

Art.8

Su/sa Sìndigu/a metropolitanu/a

1. Su/sa Sìndigu/a metropolitanu/a est elègiu/a a sufràgiu universali e diretu de is tzitadinus chi faint parti de su territòriu metropolitanu, cun sistema eletoralis determinau de lei regionali cunforma de su segundu comma de s'art.20 de sa L.R. n.2 de su 2016.

Fintzas a s'eletzioni direta de su/sa Sìndigu/a metropolitanu/a s'apricant is disponimentus cunforma a sa L.R. n.2 de su 2016.

2. Su/sa Sìndigu/a metropolitanu/a est responsàbili de s'aministratzioni de sa Tzitadi Metropolitana e dda rapresentat cunforma a sa lei. In prus:

- Cuvocat e presiedit su Cunsillu metropolitanu e sa Cunferèntzia metropolitana;
- Subraintendit a su traballu de is ufìtzius e de is servìtzius e a s'execuzioni de is autus;
- Esertizat is àteras funtzionis chi ddi funt atribuidas de sa lei;
- Proponit acòrdius e cunventzionis de sa Tzitadi Metropolitana e àterus entis.

Intèndia sa Cunferèntzia metropolitana:

- Donat is incàrrigu dirigenzialis;
- Provedit a nominai, desinniai e revocai is rapresentantis de sa Tzitadi metropolitana ne is entis, aziendas e sotziedadis, arrespetendi is deliberatzionis de su Cunsillu;
- Proponit a su Cunsillu is schemas de bilànciu e is variatzionis relativas.

3. Su/sa Sìndigu/a metropolitanu/a podit presentai a su Cunsillu e a sa Cunferèntzia metropolitana is líneas programàticas de fai in su mandau.

4. Su/sa Sìndigu/a metropolitanu/a pigat e impreat is pròpius disponimentus cun is decretus.

5. Su/sa Sìndigu/a metropolitanu/a fait totu is atus chi no funt arreservaus, de sa lei o de su Statutu, a su Cunsillu Metropolitanu, a sa Cunferèntzia Metropolitana o a is dirigentis.

Art.9

Su Vicesìndigu/sa Vicesìndiga

1. Su/sa Sìndigu/a metropolitanu/a podit nominai un/una Vicesìndigu/a, stabilendi is funtzionis chi a issu/issa ddis at delegau, donendi-de-ndi comunicatzioni de luegu a su Cunsillu e a sa Cunferèntzia metropolitana.

2. Chi nc'est un impedimentu temporàneu o est assenti, o benit suspèndiu o decadit po is arraxonis prevedias de sa lei, s'incàrrigu de Sìndigu/a metropolitanu/a ddu pigat su vicesìndigu/a.

3. Su Sìndigu/a metropolitanu/a podit revocai su/sa vicesìndigu/a in dònna momentu, fintzas chi no nc'est prus sa fidùcia, donendi-de-ndi comunicatzioni a su Cunsillu metropolitanu in sa primu setzida chi si fait.

Art.10

Su/is Cunsilleris/as delegaus/as

1. Su/sa Sìndigu/a metropolitanu/a, in prus de su/sa vicesìndigu/a, podit delegai canunu incàrrigu, po is setoris orgànicus, o po is àmbitus territorialis, o programmas spetzìficus e progetus.

De custu incàrrigu benit data comunicatzioni a su Cunsillu e a sa Cunferèntzia metropolitana in sa primu setzida a disponimentu. Is dèlegas funt bàllidas de candu benint atzetadas.

2. Is delegaus/das tenint su doveri, de riferiri a su Cunsillu e a sa Cunferèntzia metropolitana po dònna argumentu de totu is dèlegas arritzias, sarvu chi su Sìndigu/a detzidat de ddu riferiri issu/a etotu.

3. Su Sìndigu/a metropolitanu/a podit revocai una o prus dèlegas cunferidas in dònna momnetu,

fintzas chi benit a amancai su raportu de fidùcia, donendi-de-ndi comunicatzioni a su Cunsillu metropolitanu in sa primu setzida a disponimentu.

Art. 11

Strutura e durada de su Cunsillu metropolitanu

1. Su Cunsillu metropolitanu est fatu de su Sìndigu/a chi ddu presiedit, e de un nùmeru de cunsilleris/as stabiliu de lei regionali.

2. S'eleidura de su Cunsillu si fait a sufràgiu universali e diretu cunforma a si chi prevedit sa lei.

Fintzas a s'elezioni de su Cunsillu metropolitanu s'apricant is disponimentus cunforma a sa L.R. n.2 de su 2016.

3. Su Cunsillu metropolitanu abarrat in càrriga cincu annus.

Art.12

Funtzionamentu de su Cunsillu

1. Su Cunsillu metropolitanu tenit autonomia funtzionali e organizzativa disciplinada cun regulamentu apòsitu aprovau a maggioràntzia assoluta de is cumponentis de su Cunsillu etotu.

2. Su Cunsillu est presièdiu de su/sa Sìndigu/a metropolitanu chi ddu cunvocat e detzidit is argumentus de discuti.

3. Su regulamentu de su Cunsillu metropolitanu disciplinat, in prus, su funtzionamentu de is grupus cunsiliaris, is garantzias po is minoràntzias, fait su controllu políticu-aministrativu, e stabiliscit, arrespetendi is printzìpius de custu stadudu, sa strutura organizzativa de is ufitzius de su Cunsillu, e is argumentus e is funtzionis chi pertocant su Cunsillu etotu.

4. Is setzidas de su Cunsillu funt pùbricas, sarvu po situatzionis prevedias de su regulamentu.

Art.13

Atributzionis de su Cunsillu metropolitanu

1. Su Cunsillu metropolitanu est su sugetu chi donat is inditus e controllat sa Tzitadi metropolitana.

2. Su Cunsillu metropolitanu:

- Proponit a sa Cunferèntzia metropolitana is modificas a su statutu;
- Aprovat is regulamentus po sa disciplina de is funtzionis de cumpetèntzia de s'enti, a esclusioni de su regolamentu po s'ordinamentu de is ufitzius e servìtzius;
- Aprovat sa pianificatzioni e is programmas finantziàrius e tènnicus aministrativus;

- Imperat is schemas de bilànciu cun proposta de su Sìndigu/a metropolitanu. Achiriu su parri de sa Cunferèntzia metropolitana, aprovat a manera definitiva su bilànciu;
- Aprovat cunventzionis infra is comunus e is assotziatzionis insoru e acòrdius cun Entis e comunus chi no faint parti de su territòriu metropolitanu.

3. Su Cunsillu imperat atus generalis de indiritzu polìticu de programatzioni, cun riferimentu particulari a:

- Su pianu stratègicu metropolitanu e a su Pianu Territoriali de Coordinamentu Metropolitanu, pustis intèndia sa Cunferèntzia metropolitana;
- A is funtzionis de promotzioni e coordinamentu de su sviluppu econòmicu, sotziali e culturali;
- A sa struturatzioni de sistemas coordinaus de gestioni de is servìtzios pùbricus de interessu generali de àmbitu metropolitanu;
- A sa mobilitadi e viabilitadi chi pertocat sa Tzitadi metropolitana;
- A s'arregorta, elaboratzioni de is datus, informatizzioni e digitalizzioni in àmbitu metropolitanu;
- A s'amparu e valorizzioni de s'ambienti.

4. Is deliberatzionis chi pertocant is argumentus de custu artìculu non podint èssiri pigadas a manera urgenti de àterus ufizius de sa tzitadi metropolitana, sarvu de cussas chi pertocant is variatzionis de su bilànciu fatas de su Sìndigu de sutapònniri a ratìfica de su cunsillu aintru de sessanta diis sighentis, o at a decadi.

Art.14

Diritus e doveris de is Cunsilleris/as metropolitanus/as

1. Dònna Cunsilleri/a metropolitanu/a rapresentat sa comunidadi metropolitana e depit esertzitai cun lealtadi is incàrrigus fora de tènneri vìncolu de mandau.

2. Is prerogativas, sa positzioni giuridica e is poderis de iniziativa funt dissiplinaus in su regolamentu de su Cunsillu.

Art.15

Sa Cunferèntzia metropolitana

1. De sa Cunferèntzia metropolitana faint parti su/sa Sìndigu/a metropolitanu/a e is Sindigus/as de totu is comunus chi funt in su territòriu de sa Tzitadi metropolitana de Casteddu.

2. Chi su Sìndigu/a metropolitanu est assenti o no podit pigai parti, sa Cunferèntzia est presièdia de su cumponenti prus giòvanu.

3. Sa Cunferèntzia deliberat a manera bàllida cun is votus chi rapresentant assumancu una de is tres partis de is Comunus e sa maggioràntzia de is residentis in su territòriu metropolitanu.

4. Totu is autus de su/sa Sìndigu/a e de su Cunsillu metropolitanu funt intregaus a is componentis de sa Cunferèntzia metropolitana.

5. Sa Cunferèntzia metropolitana aprovat:

- Su statutu e is modìficas chi ddu pertocant;
- Su regulamentu po dissiplinai sa struttura cunforma a is normas.

TÌTULU IV

Organismus partetzipaus

Art.16

Organismus partetzipaus

1. Sa Tzitadi metropolitana no podit istituiri organismus partetzipaus nous.
2. Po arrennesci a traballai mellus, a si coordinai apari e assegurai unu traballu totus impari de is funtzionis chi ddi pertocant, sa Tzitadi metropolitana circat de favoressi is partecipatzionis detènnias de is entis chi ndi faint parti po valurai, impari a is Comunas interessaus, is atzionis eventualis chi ndi permitant s'integratzioni e sa valorizatzioni de is sugetus chi giai ddoi funt in su territòriu de riferimentu.
3. Sa Tzitadi Metopolitana podit pigai partecipatzionis ne is organismus partetzipaus de is Comunas chi ndi faint parti e ne is organismus chi produsint servìtzius de interessu generali in s'àmbitu de su livellu respetivu de cumpetèntzia.
4. Sa partecipatzioni de sa Tzitadi metropolitana est propònna de su/sa Sìndigu/a e deliberada a magioràntzia assoluta de su Cunsillu metropolitanu. Is pròpias modalidadis s'apricant chi ddoi est modìfica e dismissioni de sa partetzipatzioni.
5. Su regulamentu po is partetzipatzionis prevedit e dissiplinat unu controllu adeguau, vigilàntzia e trasparèntzia cunforma a is printzìpius prevedius de sa normativa natzionali e regionali po is partetzipatzionis de is entis localis.
6. Su/sa Sìndigu/a metropolitanu/a sovrintendit e nd'assegurat sa vigilàntzia e su controllu cunforma a su regulamentu de su comma pretzedenti.
7. Sa nòmina, sa desinniatzioni e sa rèvoca de is rapresentantis de sa Tzitadi metropolitana ne is entis, aziendas sotziedadis e organismus funt dispònias de su/sa Sìndigu/a metropolitanu/a, cunforma a is inditus stabilius de su Cunsillu.

TÌTULU V

Is raportus de sa Tzitadi metropolitana cun is àterus entis.

Art.17

Cunferimendu de is funtzionis de sa Tzitadi metropolitana a is comunus de su territòriu metropolitanu

1. Sa Tzitadi metropolitana, po gosai cun prus eficèntzia, eficàtzia e economitzidadi de is servìtzius donaus a is tzitadinus e tzitadinas in s'àmbitu territoriali de riferimentu, podit delegai is pròpias funtzionis a is comunus, a is unionis de is comunus o a is àmbitus prus piticus chi de prus podint sodisfai is istàntzias de sa coletividadi locali arrespetendi is printzìpius de sussidarietàadi, diferentziatzioni, adeguamentu e proportzionalidadi.
2. Sa dèlega de is funtzionis spetat a su Cunsillu metropolitanu, cun proposta de su/sa Sìndigu/a metropolitanu/a, intèndia sa Cunferèntzia metropolitana, fintzas detzidendi de trasferiri arresursas umanas e strumentalis e arresursas finantziàrias relativas, arregulendi-de-ndi cunditzionis e vìncolus cun conventzioni apòsita.
3. In sa conventzioni funt spetzificaus is poderis eventualis chi sa Tzitadi metropolitana s'apoderat, po coordinai e vigilai po s'esertzìtzio de is funtzionis delegadas a is comunus. Funt spetzificadas is cunditzionis innui sa Tzitadi metropolitana s'arreservat de revocai sa dèlega, e is limitis de tempus eventualis.

Art.18

Acòrdius, conventzionis e àteras collaboratzionis de sa Tzitadi metropolitana e is comunus de su territòriu metropolitanu

1. Sa Tzitadi metropolitana podit fai acòrdius, conventzionis a àteras arratzas de cooperatzioni e collaboratzioni cun is comunus po s'organizatzioni e sa gestioni assotziada de is servìtzius, de sa gestioni impari e cunpartzia in s'esertzìtzio de is funtzionis rispetivas, o po realizai òperas pùblicas de interessu po totus.
2. Po svolgi is funtzionis, servìtzius o atividadis spetzificas, comunus a solus o is unionis de comunus podint tenni s'agiudu de is ufitzius de sa Tzitadi metropolitana e, a manera retzìproca, sa Tzitadi metropolitana podit tenni s'agiudu de is ufitzius de is comunus, cunforma a is conventzionis chi definiscint obietivus, modalidadis, raportus finantziàrius de is aministratzionis coinvòlgias.
3. Sa Tzitadi metropolitana podit stipulai conventzionis cun is comunus po s'organizatzioni de is ufitzius cunpartzius po is funtzionis, servìtzius o atividadis spetzificas, agatendi s'aministratzioni capofila innui at a traballai s'ufitziu, e definendi s'organizatzioni, is funtzionis e sa parti finantziària.

Art.19

Acòrdius de sa Tzitadi metropolitana e entis foras de s'àrea metropolitana

1. Sa Tzitadi metropolitana, po garantiri de atuai is obietivus de sa programatzioni pròpia po prus annus, favoressit acòrdius cun àterus entis, fintzas internatzionalis.
2. Sa Tzitadi metropolitana podit fai acòrdius e cunventzionis cun comunus, a solus o assotziaus, o cun àterus entis chi funt foras de su territòriu de s'àrea metropolitana po realizai una gestioni integrada de is servìtzius pùblicos po s'interessu de totus, o de favoressi su coordiamentu de is atividadis respetivas, prevedendi fintzas, candu su servìtziu o sa prestatzioni ddu permitit, o de benefitziai a manera retzìproca de is ufìtzius, de is dèlegas po arresparmiar, èssiri prus eficaci e efizienti cumenti servìtzius.
3. A is acòrdius de sa Tzitadi metropolitana e sugetus foras de su territòriu podint pigai parti fintzas is comunus a solus o assotziaus aintru de sa Tzitadi metropolitana etotu.

Art.20

Cooperatzioni metropolitana po sa gestioni e valorizatzioni de is arresursas umanas.

1. Sa Tzitadi Metropolitana favoressit sa cooperatzioni de is aministratzionis localis de su territòriu metropolitanu po arresparmiar cun s'efitcèntzia de is ufìtzius relativus e servìtzius cunforma a is critèrius de eficàtzia, economitzidadi, trasparèntzia, sempreficatzioni e valorizatzioni de is professionalidadis de dirigentis e dependentis.
2. Favoressit s'annoamentu e sa sempreficatzioni amministrativa e omogeneizatzioni de is protzeduras amministrativas po sa comunidadi metropolitana. Po custu sa Tzitadi metropolitana favoressit s'impreu de trastus de e-governement chi milliorint is servìtzius donaus e faint prus sèmplici sa relata de is tzitadinus-impresas e istituzionis.
3. Sa Tzitadi metropolitana ponit a disponimentu sa struttura chi tenit, po s'interessu de is comunus e de is unionis de is comunus, cun cunventzionis spetzìficas.

Art.21

Vigilàntzia e controllu po s'atuatzioni de is acòrdius

1. Su/sa Sìndigu/ metropolitanu/a billat po s'atuamentu de is acòrdius e intesas e dònna annu presentat a su Cunsillu e a sa Cunferèntzia metropolitana una relata po su traballu chi ant fatu.

TÌTULU VI ORGANIZATZIONI

Art.22 Printzìpius generalis

1. Sa Tzitadi metropolitana dissiplinat cunforma a su Regulamentu de organizazioni de is Ufitzius e de is Servìtzius is caraterìsticas spetzificas de su modellu organizativu de issu etotu.
2. In s'organizazioni de is Ufitzis e de is Servìtzius sa Tzitadi metropolitana pessighit obietivus e imperat critèrius acapius a printzìpius de legalidadi, eficèntzia, eficàtzia, controllu de sa spesa, trasparèntzia, cumpetèntzia, semprificatzioni, valorizatzioni de sa professionalidadi de is dipendentis, oportunitadis uguallis po totus e arrespetu de is relatzionis sindacalis.
3. Su Regulamentu po s'organizazioni de is Ufitzius e de is Servìtzius definissit in particulari s'organizazioni de s'Enti, sa modalidadi e is critèrius po sa nòmina de su/sa Segretàriu/a Generali, po sa nòmina de su/sa Diretori/a Generali, po is incàrrigus dirigentzialis, po su sistema de controllu e valutatzioni de su rendimentu de su traballu.
- 3 - bis. Sa Tzitadi metropolitana de Casteddu podit imperari figuras dirigentzialis cun cuntratu de traballu a tempus determinau cunforma a s'art.110 de su D.Lgs. n.267/2000.**
4. Su Regulamentu po s'organizazioni de is Ufitzius e de is Servìtzius est aprovau de su/sa Sìndigu/a de sa Tzitadi metropolitana, intèndiu su parri de sa Cunferèntzia metropolitana.

Art.23 Su sistema de diretzioni

1. A su vèrtitzi de sa Tzitadi metropolitana ddoi funt is Dirigentis.
2. Su/sa Sìndigu/a de sa Tzitadi metropolitana donat is incàrrigus dirigentzialis cun sa modalidadi e is critèrius stabilius in su Regulamentu po s'organizazioni de is ufitzius e de is servìtzius.
3. Su/sa Sìndigu/a de sa Tzitadi metropolitana nòminat su/a Segretàriu/a generali.
4. Su/sa Sìndigu/a de sa Tzitadi metropolitana nòminat su Diretori Generali cun is modalidadis e critèrius stabilius in su Regulamentu po s'organizazioni de is ufitzius e de is servìtzius.

TÌTULU VII Disponimentus transitòrius e finalis

Art.24 Aprovu e modìficas de su statutu

1. Su statutu est aprovau de sa Cunferèntzia metropolitana cun is votus assumancu de una de tres partis de is comunus chi faint parti de sa Tzitadi metropolitana e sa maggioràntzia totali de sa populatzioni residenti.
2. Is modìficas a-i custu Statutu funt proponnias a sa Cunferèntzia metropolitana de su Sìndigu, o assumancu una de tres partis de is componentis de sa Cunferèntzia, o assumancu de una de tres partis de is componentis de su Cunsillu.

Art.25
Disponimentus transitòrius

1. Is regolamentus de sa Tzitadi metropolitana funt aprovaus aintru de 180 diis de sa data de intrada in vigèntzia de su Statutu.
2. Fintzas a candu is regolamentus de sa Tzitadi metropolitana no benint aprovaus, s'apricant is regolamentus de sa Provìntzia de Casteddu.

Art.26
Disponimentus finalis

1. Po totu si chi no est prevediu de custu Statutu, si depit fai riferimentu a is disponimentus de sa lei regionali de su 4 de su mesi de Freàrgiu 2016, n.2 “Riòrdinu de su sistema de is autonomias localis de sa Sardìnnia” e a sa lei de su 7 de Abrili 2014, n.56 “Disponimentus po is Tzitis Metropolitanas, Provìntzias, Unionis e fusionis de Comunas”, e de is disponimentus de su decretu legislativu 18 de Austu 2000, n.267.

Art.27
Intrada in vigèntzia

1. Custu statutu est pubricau in su bulletinu ufiziali de sa Regioni Sardìnnia e apicau a s'albu pretòriu de sa Tzitadi Metropolitana de Casteddu e in cussus de is comunus chi ndi faint parti.
2. Custu statutu intrat in vigèntzia pustis trinta diis de candu benit apicau in s'albu pretòriu de sa Tzitadi Metropolitana.